



O‘ZBEKISTON RESPUBLIKASI XALQ TA’LIMI VAZIRINING BUYRUG‘I

Umumiy o‘rta ta’lim maktablari uchun 2020-2021-o‘quv yiliga mo‘ljallangan tayanch o‘quv rejani tasdiqlash to‘g‘risida

O‘zbekiston Respublikasi Prezidentining “Xalq ta’limi tizimiga boshqaruvning yangi tamoyillarini joriy etish chora-tadbirlari to‘g‘risida” 2018-yil 5-sentabrdagi PQ-3931-son qarori, O‘zbekiston Respublikasi Prezidenti Sh.M.Mirziyoyev huzurida 2019-yil 23-avgust kuni kengaytirilgan tarzda o‘tkazilgan 34-sonli yig‘ilish bayoni, O‘zbekiston Respublikasi Vazirlar Mahkamasining “O‘zbekiston Respublikasi Xalq ta’limi vazirligi to‘g‘risidagi Nizomni tasdiqlash haqida” 2019-yil 19-fevraldagi 146-son qarorining ijrosini ta’minlash, shuningdek, o‘quv-tarbiya jarayoniga o‘qitishning zamonaviy ilg‘or shakllarini, o‘quvchilarning o‘quv, psixologik va jismoniy yuklamasini maqbullashtirishni hisobga olgan holda ta’lim-tarbiyaning samarali shakllari va usullarini joriy etish, umumiy o‘rta ta’lim maktablari uchun 2020-2021-o‘quv yiliga mo‘ljallangan tayanch o‘quv rejani tasdiqlash maqsadida **buyuraman:**

1. Umumiy o‘rta ta’lim maktablari uchun 2020-2021-o‘quv yiliga mo‘ljallangan tayanch o‘quv reja 1-ilovaga, tushuntirish xati 2-ilovaga muvofiq tasdiqlansin.

2. Respublika ta’lim markazi (H.Daminov)ga:

bir oy muddatda tayanch o‘quv reja asosida tegishli o‘quv dasturlarini takomillashtirish va o‘rnatilgan tartibda tasdiqlash uchun Xalq ta’limi vazirligiga kiritish;

joriy yilning 1-avgustiga qadar tayanch o‘quv reja asosida fanlar yo‘nalishida metodik tavsiyalar ishlab chiqish va joylarga yetkazish vazifalari topshirilsin.

3. O‘quv jarayonini metodik jihatdan ta’minlashni rivojlantirish boshqarmasi (D.Ermatov) hududiy xalq ta’limi boshqarmalari bilan hamkorlikda tayanch o‘quv rejaning mazmun-mohiyatini Avgust kengashlari va bevosita pedagogik jamoalarda keng tushuntirish ishlarini tashkil qilsin.

4. Qoraqalpog‘iston Respublikasi Xalq ta’limi vaziri, Toshkent shahar xalq ta’limi bosh boshqarmasi va viloyatlar xalq ta’limi boshqarmalari boshliqlariga:

2020-2021-o‘quv yili davomida umumiy o‘rta ta’lim maktablarida tayanch o‘quv reja va uning tushuntirish xatida belgilangan vazifalarning bajarilishini ta’minlash;

joriy yilning 25-avgustiga qadar umumiy o‘rta ta’lim maktablarida direktorning o‘quv ishlari bo‘yicha o‘rinbosarlari tomonidan 2020-2021-o‘quv yiliga mo‘ljallangan tayanch o‘quv rejadan kelib chiqqan holda umumiy o‘rta ta’lim muassasalari xodimlarining ish yuklamalari tarifikatsiyasi va dars jadvallarining ishlab chiqilishini ta’minlash;

joriy yilning 30-avgustiga qadar 2020-2021-o‘quv yiliga mo‘ljallangan tayanch o‘quv rejadagi yangiliklar va tushuntirish xatining mazmun-mohiyatini har bir ta’lim muassasasiga yetkazish, pedagogik kengash yig‘ilishlarida hamda keng jamoatchilik o‘rtasida targ‘ibot-tashviqot ishlarini tashkil etish vazifalari topshirilsin.

5. Umumiy oʻrta taʼlim muassasalarida tayanch oʻquv rejani bajarish va natijalarini tahlil etib borish ishlariga hududiy xalq taʼlimi boshqarmalari hamda taʼlim muassasalari rahbarlari shaxsan masʼul etib belgilansin.

6. Umumiy oʻrta taʼlim muassasalari faoliyatini muvofiqlashtirish boshqarmasi boshligʻi (E.Murodov) Qoraqalpogʻiston Respublikasi Xalq taʼlimi vazirligi, Toshkent shahar xalq taʼlimi bosh boshqarmasi va viloyatlar xalq taʼlimi boshqarmalari tomonidan umumiy oʻrta taʼlim muassasalarida oʻquv-tarbiya jarayonining tayanch oʻquv reja asosida tashkil etilishini nazoratga olsin.

7. A.Avloniy nomidagi Xalq taʼlimi tizimi rahbar va mutaxassis xodimlarini qayta tayyorlash va malakasini oshirish instituti (F.Karimov) hamda xalq taʼlimi xodimlarini qayta tayyorlash va malakasini oshirish hududiy markazlari **joriy yil mart oyidan boshlab** tinglovchilarga umumiy oʻrta taʼlim maktablari uchun 2020-2021-oʻquv yiliga moʻljallangan tayanch oʻquv rejadagi yangiliklar va tushuntirish xatining mazmun-mohiyatini tushuntirish ishlarini olib borsin.

8. Jamoatchilik va ommaviy axborot vositalari bilan aloqalar boʻlimi (A.Umarov) umumiy oʻrta taʼlim maktablari uchun 2020-2021-oʻquv yiliga moʻljallangan tayanch oʻquv reja va tushuntirish xatini vazirlikning veb-saytida yoritсин.

9. Mazkur buyruq qabul qilinishi munosabati bilan, Xalq taʼlimi vazirining 2019-yil 9-sentabrdagi “Umumiy oʻrta taʼlim muassasalarining 10-11-sinflari oʻquvchilariga kasbiy taʼlim berishga ixtisoslashgan oʻquv-ishlab chiqarish majmualarini tugatish toʻgʻrisida”gi 293-sonli buyrugʻining birinchi ilovasi joriy yil 1-iyuldan oʻz kuchini yoʻqotgan deb hisoblansin.

10. Mazkur buyruqning ijrosini nazorat qilishni oʻz zimmasida qoldiraman.

Vazir



Sh.Shermatov

Toshkent sh,
2020-yil "25"-fevral,

52-son

O'zbekiston Respublikasi
Xalq ta'limi vazirining
2020-yil 25-fevraldagi
52-sonli buyrug'iga
1-ILOVA

**Umumiy o'rta ta'lim maktablari uchun 2020-2021-o'quv yiliga mo'ljallangan
tayanch o'quv reja**

T/r	Fan yo'nalishlari va nomlari	Haftalik o'quv soatlari (sinflar kesimida)											Haftalik umumiy soat
		I	II	III	IV	V	VI	VII	VIII	IX	X	XI	
I.	Filologiya fanlari	10	11	11	11	11	11	10	10	10	9	9	113
1	Ona tili va adabiyot	8	7	7	7	5	5	4	4	4	3	3	57
2	O'zbek tili/rus tili		2	2	2	3	3	3	3	3	3	3	27
3	Chet tili	2	2	2	2	3	3	3	3	3	3	3	29
II.	Ijtimoiy fanlar	1	1	1	1	3	3	4	5	5	4	4	32
4	Tarix					2	2	3	3	3	2	2	17
5	Davlat va huquq asoslari								1	1	1	1	4
6	Tarbiya	1	1	1	1	1	1	1	1	1	1	1	11
III.	Aniq fanlar	5	5	5	5	6	6	6	6	7	7	7	65
7	Matematika	5	5	5	5	5	5	5	5	5	5	5	55
8	Informatika va axborot texnologiyalari					1	1	1	1	2	2	2	10
IV.	Tabiiy va iqtisodiy fanlar	1	1	1	1	2	6	8	9	9	9	10	57
9	Fizika va astronomiya						2	2	2	2	2	3	13
10	Kimyo							2	2	2	3	3	12
11	Biologiya					1	2	2	2	2	3	3	15
12	Geografiya va iqtisodiyot	1	1	1	1	1	2	2	3	3	1	1	17
V.	Amaliy fanlar	4	4	4	4	6	6	6	4	4	3	2	47
13	Musiq madaniyati	1	1	1	1	1	1	1					7
14	Tasviriy san'at va chizmachilik	1	1	1	1	1	1	1	1	1			9
15	Texnologiya	1	1	1	1	2	2	2	1	1			12
16	Jismoniy tarbiya	1	1	1	1	2	2	2	2	2	2	1	17
17	Chaqiruvga qadar boshlang'ich tayyorgarlik										1	1	2
Jami		21	22	22	22	28	32	34	34	35	32	32	314

-Umumiy o'rta ta'lim maktablari uchun 2020-2021-o'quv yiliga mo'ljallangan tayanch o'quv rejaga tushuntirish xati

I. Asosiy tamoyillar

1. 2020-2021-o'quv yiliga mo'ljallangan tayanch o'quv reja quyidagi tamoyillarga yo'naltirilgan:

O'zbekiston Respublikasi xalq ta'limi tizimini 2030-yilgacha rivojlantirish konsepsiyasi asosida:

PISA (*Programme for International Student Assessment*), **PIRLS** (*Progress in International Reading Literacy Study*), **TIMSS** (*Trends in Mathematics and Science Study*) xalqaro miqosda o'quvchilarni baholash dasturida ishtirok etishga tayyorgarlik ko'rish;

“**STEAM** – ta'lim” (*Science, Technology, Engineering, Art, Mathematics – biologiya, kimyo, fizika, informatika, matematika, tasviriy san'at, musiqa*) dasturini joriy etish;

kompetensiyaviy yondashuvga asoslangan umumiy o'rta ta'limning davlat ta'lim standartini amaliyotga joriy qilish;

“Tarbiya” fanining o'qitilishini bosqichma-bosqich joriy etish;

raqamli iqtisodiyot asoslari hamda informatika va axborot-kommunikatsiya texnologiyalari bo'yicha o'quvchilarga bilim berish;

O'zbek tilining ona tili va davlat tili sifatida o'qitilishini ta'minlash;

2018-yil 27-aprelda tasdiqlangan 0341-16 (1)-son Sanitariya qoidalari, normalari va gigiyena normativlari (SanQvaN)ga amal qilish.

II. O'quv soatlarining taqsimlanishi

2. Tayanch o'quv rejada “Ona tili va adabiyot.” fani uchun ajratilgan haftalik o'quv soatlari quyidagicha taqsimlanadi:

1-sinfda o'quv yilining 1-2-choraklarida haftasiga 4 soat “Alifbe”, 4 soat “Yozuv”, 3-4-choraklarida 4 soat “Ona tili” va 4 soat “O'qish” fani;

2-4-sinflarda haftasiga 4 soat “Ona tili” va 3 soat “O'qish” fani;

5-6-sinflarda haftasiga 3 soat “Ona tili” va 2 soat “Adabiyot” fani;

7-9-sinflarda haftasiga 2 soat “Ona tili” va 2 soat “Adabiyot” fani;

10-11-sinflarda haftasiga 1 soat “Ona tili” va 2 soat “Adabiyot” fani o'qitiladi.

3. Tayanch o'quv rejada “O'zbek tili/rus tili” fani uchun 2-4-sinflarda haftasiga 2 soatdan, 5-11-sinflarda haftasiga 3 soatdan ajratilgan bo'lib, ushbu fanlar quyidagi taqsimot asosida o'qitiladi:

ta'lim rus va qardosh tillarda olib boriladigan ta'lim muassasalarida “O'zbek tili” fani 2-4-sinflarda 2 soatdan, 5-11-sinflarda 3 soatdan o'qitiladi;

ta'lim o'zbek tilida olib boriladigan ta'lim muassasalarida “Rus tili” 2-11-sinflarda 2 soatdan o'qitiladi, 5-11-sinflarda qolgan 1 soat “Ona tili va adabiyot” faniga qo'shib beriladi (mazkur 1 soat 9-sinfda “Adabiyot” faniga, qolgan sinflarda “Ona tili” faniga qo'shib beriladi);

ta'lim qoraqalpoq, qozoq, qirg'iz, tojik va turkman tillarida olib boriladigan maktablarda "Rus tili" fani o'quvchilar va ota-onalar (*yoki ularning o'rnini bosuvchi shaxslar*)ning xohishi (qarori)ga ko'ra, 2-sinfdan boshlab "Ona tili va adabiyot" fanidan 1 soat olinib o'qitilishi mumkin.

4. "Tarix" fani uchun ajratilgan haftalik o'quv soatlari quyidagicha taqsimlanadi:

7-8-9-sinflarda "O'zbekiston tarixi" fani o'quv yilining 1-2-choraklarida haftasiga 1 soatdan, 3-4-choraklarida haftasiga 2 soatdan, "Jahon tarixi" fani o'quv yilining 1-2-choraklarida haftasiga 2 soatdan, 3-4-choraklarida haftasiga 1 soatdan o'qitiladi;

10-11-sinflarda "O'zbekiston tarixi" fani haftasiga 1 soatdan, "Jahon tarixi" fani 1 soatdan o'qitiladi.

5. "Tarbiya" fanini o'qitish bosqichma-bosqich joriy qilinadi:

2020-2021-o'quv yilida 1-9-sinflarda "Tarbiya" fani 1 soatdan;

10-11-sinflarda "Ma'naviyat asoslari" va "Dunyo dinlari tarixi" 0,5 soatdan, jami 1 soat o'qitiladi.

6. "Matematika" faniga ajratilgan soatlar quyidagicha taqsimlanadi:

1-6-sinflarda "Matematika" fani haftasiga 5 soatdan;

7-11-sinflarda "Algebra" fani 3 soatdan, "Geometriya" fani 2 soatdan o'qitiladi.

7. "Fizika" faniga ajratilgan soatlar quyidagicha taqsimlanadi:

6-11-sinflarda "Fizika" fani haftasiga 2 soatdan, 11-sinfda "Astronomiya" fani haftasiga 1 soat o'qitiladi.

8. "Geografiya va iqtisodiyot" faniga ajratilgan soatlar quyidagicha taqsimlanadi:

1-2-sinflarda "Atrofimizdagi olam" fani haftasiga 1 soatdan;

3-4-sinflarda "Tabiatshunoslik" fani haftasiga 1 soatdan;

5-sinfda "Geografiya" fani haftasiga 1 soat, 6-7-sinflarda 2 soatdan, 8-9-sinflarda "Geografiya" fani haftasiga 2 soatdan, "Iqtisodiy bilim asoslari" fani 1 soatdan, 10-sinfda "Geografiya" fani 1 soat, 11-sinfda "Tadbirkorlik asoslari" fani 1 soat o'qitiladi. Bu orqali o'quvchilarning moliyaviy savodxonligini oshirish nazarda tutilgan.

9. "Tasviriy san'at va chizmachilik" faniga ajratilgan soatlar quyidagicha taqsimlanadi:

1-7-sinflarda "Tasviriy san'at" fani haftasiga 1 soatdan o'qitiladi;

8-9-sinflarda "Chizmachilik" fani haftasiga 1 soatdan o'qitiladi.

III. Yakuniy qoidalar

10. Haftasiga "Informatika va axborot texnologiyalari" faniga 6-sinfda qo'shib berilgan 0,5 soat, "Kimyo" va "Biologiya" fanlariga 10-11-sinflarda qo'shib berilgan 1 soat, "Matematika" faniga 10-sinfda qo'shib berilgan 1 soatning o'qitilishi, shuningdek, 10-11-sinflarda "Dunyo dinlari tarixi" fanini haftasiga 0,5 soatdan o'qitish bo'yicha Respublika ta'lim markazi tomonidan metodik tavsiyalar ishlab chiqiladi.

11. O'zbekiston Respublikasi Vazirlar Mahkamasining "Umumiy o'rta ta'lim to'g'risidagi nizomni tasdiqlash haqida" 2017-yil 15-martdagi 140-son qaroriga muvofiq:

malakali o'qituvchilar yetarli bo'lgan taqdirda o'quvchilar soni 25 nafar va undan ziyod bo'lgan umumiy o'rta ta'lim muassasalarining 1-11-sinflarida "Chet tili" fani, ayrim fanlar chuqur o'rganiladigan davlat ixtisoslashtirilgan umumiy o'rta ta'lim muassasalari va umumiy o'rta ta'lim maktablarining ixtisoslashtirilgan sinflarida ixtisoslashtirilgan fan, 5-11-sinflarda "Informatika va axborot texnologiyalari", ta'lim tili o'zbek tili bo'lmagan umumiy o'rta ta'lim muassasalarining 2-11-sinflarida "O'zbek

tili” hamda ta’lim tili rus tili bo’lmagan umumiy o’rta ta’lim muassasalarining 2-11-sinflarida “Rus tili”, 8-11-sinflarda “Jismoniy tarbiya”, 5-9-sinflarda “Texnologiya” fanlari ikki guruhga bo’lib o’qitiladi.

12. O’quv-tarbiya jarayonini tashkil etishda quyidagi muddatlarga amal qilinadi:
o’quv yilining davomiyligi - 34 hafta (1-sinflar uchun 33 hafta);
o’quv haftasining davomiyligi – 1-4-sinflarda 5 kun, 5-11-sinflarda 6 kun;
dars mashg’ulotining davomiyligi - 45 daqiqa;
dars mashg’ulotlari oralig’idagi tanaffus davomiyligi - 5-10 daqiqa (o’quv kuni o’rtasidagi tanaffusning davomiyligi - 15-30 daqiqa).

13. Tegishli qonun hujjatlarida belgilangan bayram (ishlanmaydigan) kunlarida dars mashg’ulotlari o’tkazilmaydi.

Bayram (ishlanmaydigan) kunlariga to’g’ri kelib qolgan dars mashg’ulotlarining mavzulari o’quv dasturlarini ixchamlashtirgan holda keyingi dars mashg’ulotlarida o’tiladi.

14. O’quv yili davomidagi ta’tillarning muddatlari quyidagicha belgilanadi:
kuzgi ta’til – 4-noyabrdan boshlab 6 kalendar kuni;
qishki ta’til – 28-dekabrdan boshlab 14 kalendar kuni;
bahorgi ta’til – 21-martdan boshlab 7 kalendar kuni;
yozgi ta’til - oxirgi bosqichli nazorat sinovi o’tkazilgan kundan (bosqichli nazorat o’tkazilmaydigan sinflar uchun o’quv yili tugagan kundan keyingi kundan) boshlab 1-sentabrgacha.

Ta’tilning oxirgi kuni bayram (ishlanmaydigan) kuniga to’g’ri kelib qolgan taqdirda, dars mashg’ulotlari keyingi ish kunidan boshlab davom ettiriladi.

1-sinf o’quvchilari uchun fevral oyi davomida qo’shimcha bir haftalik ta’til beriladi.

15. Ta’lim qoraqalpoq, rus, qozoq, tojik, qirg’iz, turkman tillarida olib boriladigan maktablarda Pedagogik Kengashning qaroriga binoan ayrim fanlar o’zbek (davlat) tilida o’qitilishi mumkin.

16. Mazkur tayanch o’quv reja va tushuntirish xati asosida har bir umumiy o’rta ta’lim muassasasi 2020-2021-o’quv yiliga mo’ljallangan o’quv rejasini ishlab chiqadi va avgust oyidagi Pedagogik kengashning qarori bilan tasdiqlaydi.

17. Pedagog kadrlar salohiyati hamda moddiy-texnika bazasi yetarli bo’lgan umumiy o’rta ta’lim muassasalarida Qoraqalpog’iston Respublikasi Xalq ta’limi vazirligi, Toshkent shahar xalq ta’limi bosh boshqarmasi va viloyatlar xalq ta’limi boshqarmalarining ruxsati bilan umumiy o’rta ta’lim muassasalarining Pedagogik kengashlariga dars jadvalini tuzishda tayanch o’quv rejadagi umumiy soatlar hajmidan oshmagan holda, ma’lum bir fanlarni chuqurlashtirib o’qitish maqsadida 15%gacha o’zgartirish kiritish huquqi beriladi.

Fanlarni chuqur o’rganish bo’yicha fan o’qituvchisi tomonidan ishlab chiqilgan o’quv dasturlaridan amaliyotda foydalanishga O’zbekiston Respublikasi Xalq ta’limi vazirligi huzuridagi Respublika ta’lim markazi tomonidan rasmiy tasdiqlangan taqdirda ruxsat etiladi.

18. Barcha turdagi davlat umumiy o’rta ta’lim muassasalarida mazkur o’quv reja asosida tashkil etiladigan darslar (mashg’ulotlar) davlat budjeti mablag’lari hisobidan amalga oshiriladi.